

17/885  
Sarrasien  
1885  
L E T T R E

D' V N

MARGVILLER

D E P A R I S,

A S O N

C V R E:

Sur la conduite de Monseigneur  
LE COADIVTEVR.

A P A R I S,

---

M. DC. LI.





*Lettre d'un Marguillier de Paris à son Curé, sur la  
conduite de Monseigneur le Coadjuteur.*

**M**ONSIEUR,  
 J'ay leu l'Aduis des-interessé sur la conduite de Monsieur le Coadjuteur, & suiuant ses ordres & le vostre, j'en ay fait part aux plus notables Bourgeois de mon quartier ; C'est vne chose bien fascheuse de voir ce Prelat reduit à composer des Apologies dans vn temps où il ne deuroit plus auoir d'autre pensée que de continuer ses intrigues, afin d'entrer dans le Ministère: Si les mouuemens qui nous agittent depuis quatre ans, ne doivent cesser que lors qu'il y aura part, Pleut à Dieu pour son repos & pour le nostre, qu'il y feust desia bien estably. Sans mentir il faut aduouër que c'est vn homme admirable, il est sçauant, il est ferme, & l'on voit dans toutes ses actions le caractere d'un esprit pouffé d'une belle ambition, il est eloquent, & il ne fit iamais mieux que de mettre luy-mesme la main à la plume pour faire son Panegyrique, estant nostre Archeuesque, il n'y a guere d'apparence qu'il voulut nous dire des choses qui ne sont pas ; & puis qu'il publie que iusqu'icy il n'a point eu d'autre objet que sa propre gloire &



sa reputation ( pensée digne d'un grand Prelat )  
i'estime qu'il est à propos de le croire.

Cependant comme les sentimens des hommes ne sont pas tousiours semblables, lors que j'ay fait la lecture de son escrit, il s'est trouué des personnes fort bien instruites des choses de ce monde, qui ne sont pas demeurées d'accord de tout ce qu'il met en auant, & parce qu'il est important que vous sçachiez ce qui fut dit dans nostre conuersation; j'ay crû que vous seriez bien-ayse que ie vous en fisse part, & que puis qu'une petite incommodité m'oblige de garder la chambre, & m'empesche de pouuoir vous aller rendre visite, ie vous fisse sçauoir par escrit toutes les observations que l'on fit sur ce manifeste de Monsieur le Coadiuteur.

Toutela compagnie dit qu'il estoit vray, que le iour de l'emprisonnement de Monsieur de Broussel ( qui fut ce me semble le iour que l'on chantoit le *Te Deum*, pour la quatrième bataille que Monsieur le Prince auoit gagnée ) Monsieur le Coadiuteur fit paroistre tout le zele qu'un Prelat doit auoir pour la conseruation d'un bon Citoyen, qu'il dit ses sentimens à la Reyne avec generosité, & qu'ayant esté traicté de tribun du peuple, il fit cognoistre qu'il auoit du credit dans Paris, ie me souuiens fort bien encore de ce que le Mercredy au soir l'on me vint dire de sa part, & à

tous




tous nos Quarteniers aussi, & des Barricades, qui le lendemain estonnerent le Ministre qui auoit donné vn si mauuais conseil à sa Majesté.

On dit qu'il estoit vray que le Roy s'estant retiré à saint Germain, Monsieur le Coadiuteur voulut demeurer à Paris, & que bien qu'il eut enuoyé vn Gentilhomme à la Reyne pour l'assurer du contraire, il le fit arrester au bout de la rue de Nostre-Dame, & que ne craignant point d'exposer sa personne pour assseurer nos fortunes, lors que nos troupes sortoient pour aller à quelque entreprise, il les haranguoit hardiment à la porte de la Ville, & les encourageoit avec ses benedictions.

On demeura d'accord que les affaires ayant esté accommodées, Monsieur le Coadiuteur alla à Compiègne saluer leurs Maiestés sans rendre visite au Cardinal Mazarin; Mais on dit que c'estoit vne condition du traicté que Monsieur Seruient auoit fait avec lui, & que pour garder vn peu plus long temps les dehors, il auoit esté resolu que Monsieur le Coadiuteur ne verroit le Mazarin que dans le Palais Royal; Et en effet nous scauons tous qu'il le vit plusieurs fois depuis son retour, & nous en fumes scandalizés.

On dit qu'il estoit vray que M. le Prince ayant rompu avec le Cardinal Mazarin, M. le Coadiuteur luy fit offres de seruite & de Barricades, mais que M. le Prince ayma mieux remettre ses interests en-





tre les mains de son Altesse Royale, que de re-  
 mettre les armes entre les mains du peuple, ju-  
 geât bien que cela seroit de trop grande cōsequen-  
 ce pour le seruice du Roy, & pour le repos public.  
 On demeura d'accort que les Princes ayant  
 esté emprisonnez, Monsieur le Coadiuteur mes-  
 nagea si bien l'esprit de Monsieur le Duc d'Or-  
 leans qu'il le fit declarer hautement contre le  
 Cardinal Mazarin, & pour la liberté de Monsieur  
 le Prince; mais apres auoir long-temps agitè, si  
 Monsieur le Coadiuteur prit cette conduite pour  
 rendre seruice au Prince, ou pour ses interèsts par-  
 ticuliers, toute la compagnie conclut, que s'il eut  
 pû chasser le Cardinal du ministere sans faire sor-  
 tir Messieurs les Princes de prison, il n'eut pas  
 manqué de le faire; qu'en effet il fut tout son pos-  
 sible pour se rendre maistre de leurs personnes;  
 que lors que le Marechal de Turenne appro-  
 choit de Paris, il vouloit qu'on les amenat dans  
 la Bastille, & que lors qu'il vit qu'on les condui-  
 soit au Havre, de desesperant de voir reüssir son des-  
 sein, & apprehendant le retour du Cardinal, apres  
 la bataille de Rhetel, il se ioignit au party de mes-  
 sieurs les Princes pour trouuer sa seurèté, & que ce  
 fut encore à des conditions si rudes, qu'il voulut  
 plustost se faire cognoistre le Tyran que le libera-  
 teur de Monsieur le Prince.

On ne demeura pas d'accort que la suite de  
 tous les desseins de Monsieur le Coadiuteur peut



estre la marque d'une vertu inébranlable, & que toutes les actions passées de monsieur le Prince eussent esté condamnées par toute la France; Au contraire, on dit que l'en auoit veu souvent monsieur le Coadiuteur occupé à chanter des *Te Deums* pour les belles & glorieuses actions que monsieur le Prince auoit faites, mais que monsieur le Coadiuteur n'auoit point encores iusques icy obtenu de son Chapitre vn seul *Te Deum* pour tout ce qu'il auoit fait.

On dit qu'il estoit vray que lors que monsieur le Prince auoit demandé l'éloignement de ceux qui estoient dans les intérêts du Cardinal, monsieur le Coadiuteur en auoit esté d'avis, & que pour se faire encenser par le peuple, il auoit fait imprimer son opinion, mais quelqu'un adionsta qu'il auoit en cette occasion manqué à ce qu'il auoit promis à M. de Lyône dans les secrettes conférences qu'il auoit eues avecque luy, & que dans la deliberation qui se fit sur le mariage de monsieur de Mercœur, il auoit suiuy fierement les conclusions de messieurs les gens du Roy.

Dans l'endroit où il est dit que si M. le Coadiuteur consentoit au retour du Card. M. ou prenoit quelque secret engagement avec luy (comme il auoit desia fait autrefois, lors qu'il l'auoit iugé nécessaire pour ses intérêts) il perdrait ce qu'il auoit acquis d'honneur & de credit; on dit que malheu-



reusement pour luy cela n'estoit desia que trop vray.

Sur ce que l'on dit que pour décrier M. le Coadjuteur, on s'est aduisé depuis peu de publier qu'il alloit au Palais Royal, qu'on parloit de le faire ministre, & de le mettre dans les conseils du Roy, on demeura d'accord que la chose estoit vraye, que madame de Chevreuse auoit negocié son accommodement, qu'il auoit esté introduit chez la Reine secretement par Courtois, qu'il auoit respondu à sa maiesté de M. le Duc d'Orleans, du Parlement, & du peuple, & qu'il estoit facile de iuger qu'il y auoit long temps qu'il aspiroit au ministere, quelques protestations qu'il fit du contraire, que la retraite qu'il auoit faite de Luxembourg n'auoit pas esté longue, & que se picquant d'auoir pour les grandeurs vn mesme esprit que Diocletian & Charles-Quint, il s'estoit comme le premier bien tost ennuyé de la vie contemplatiue, & come l'autre repëty d'auoir quitté la Cour pour le Cloistre.

On ne demeura pas d'accord que durât le Blocus de Paris, il eut refusé plusieurs fois le chapeau de Card. & preferé la cause du peuple à cette eminente dignité; mais au contraire on dit qu'une des principales raisons qui le détacha des interets de M. le Prince de Conty fut que ce Prince consentit pour l'accommodement des affaires que l'on donnat à l'Abbé de la Riviere le Chapeau qu'il pretendoit gagner dans nostre party.

On



On ne demeura pas aussi d'accord qu'il eut toujours mesprisé de se faire connoistre par l'esclat de sa fortune, & que lors qu'il negocioit pour la liberté de Messieurs les Princes, il eut refusé le chapeau de Cardinal, au contraire on dit, que desirant d'un costé de cacher son ambition, & de l'autre d'y satisfaire, il tira vn escrit particulier de M. Arnault, par lequel ledit St Arnault s'obligeoit de faire en sorte que M. le Prince seconderoit la nomination qu'il esperoit que M. le Duc d'Orleans deuoit faire de sa personne pour le Cardinalat.

Pour l'Abaye d'Orcan on dit qu'il estoit vray qu'il l'auoit refusée, mais on expliqua cette affaire, en nous asseurant, que dans l'accommodement qu'il auoit fait avec la Cour, on luy auoit promis le premier Benefice considerable qui vacqueroit, & qu'ayant vacqué, vne Abaye de beaucoup plus grand consideration que celle d'Orcan le Cardinal qui la vouloit retenir pour soy, quoy qu'il fut engagé de donner la premiere vacquante audit sieur Coadiuteur, escriuit à Messieurs le Tellier & Seruient, pour faire en sorte, que monsieur le Coadiuteur se contentât de celle d'Orcan, que M. le Tellier ne voulut point se charger de cette negociation, que M. Seruient l'accepta, & que M. le Coadiuteur refusa l'Abaye d'Orcan, mais non pas l'autre, qui estoit d'un plus grand reuenu.

Sur ce que M. le Coadiuteur demande s'il seroit



dans les intereſts du Mazarin, quand bien il entreroit preſentement dans le Miniſtere, & ſi tout le monde n'eut pas eſté bien aïſe, qu'il y eut eſté eſtabli apres l'expulſion du Cardinal, toute la Compagnie conclud, qu'il eſtoit impoſſible dans l'eſtat preſent des affaires, qu'il y entraſt ſans auoir traité avec le Cardinal, que la Reyne conſervant toujours beaucoup d'affection pour ce Miniſtre, tous ceux qui pretendoient recevoir quelque grace de ſa Maieſté, commençoient l'eſtablifſement de leur fortune en luy promettant de contribuer leurs ſoins pour ſon retour, & que la Reyne apres la ſortie du Mazarin, n'eut iamais conſenti que M. le Coadjuteur eut entré dans le Conſeil du Roy, puis que ſa Maieſté eut approuvé par ce conſentement la conduite de ce prelat, qu'elle a ſi ſouuent accuſé d'ingratitude, & de faction.

Quant à l'article où il eſt dit, que M. le Coadjuteur eſt trop prudent pour entrer dans le Miniſtere par la voye du Mazarin, & qu'encore qu'on le veuille attirer par des proteſtations contraires, il ſçait bien qu'il n'y a pas trop de confiance à la Cour, & que les choſes paſſées peuvent eſtre le fondement d'une iuſte & veritable crainte, chacun dit que monſieur le Coadjuteur n'auoit pas ſujet de ſe plaindre de la Cour, puis qu'outre la dignité, avec laquelle il pretend eſtre à couuert de toute ſorte de reſſentiment, en ayant reçu



tant d'autres grâces pour ceux de sa faction, il a toujours manqué à ce qu'il auoit promis à la Reyne & à ses ministres, qu'il estoit bien plus heureux que M. le Prince, qui auoit toujours fidèlement seruy leurs Majestez, & qui cependant auoit esté recompensé de tant de seruices par vne prison de treize mois, reconneuë iniuste par vne Declaration du Roy, verifiée dans le Parlement, & que c'estoit à M. le Prince à dire que les choses passées peuvent estre le fondement d'une iuste & veritable crainte.

On examina fortement l'article, où il est dit qu'il ne faut point trop éleuer des hommes dont nous ne pourrions pas estre les maistres, & où il est parlé de ces nouvelles acoufations enuoyées au Parlement contre M. le Prince, & des maximes de cette politique, qui assure que le credit est plus dangereux dans la personne des Princes, que des particuliers; on iugea que tout ce raisonnement parloit d'un esprit fort ambitieux, & dont les projets estoient espouventables, puis qu'il auoit regret de ne pouuoir se rendre mettre du sang Royal, ha M. le Curé? que veut dire cela? sont ce des sentiments qu'un Prelat doive insinuer dans l'esprit des Peuples? Cét escrit Anglois qu'on a fait bruler depuis peu par la main du Bourreau a-t'il quelque chose de plus pernicieux?

Quant aux accusations, chacun dit que la De-



claration de S. A. R. les auoit destruittes à la confusion de ceux qui les ont calomnieusement inuentées, que tous les Ministres les des-adoüoient, & que ces abominables monstres de sedition, qui auoient donné ce pernicieux conseil à la Reyne, n'auoient garde de se nommer de peur d'estre déchirez par les fidelles seruiteurs de la maison Royale; que M. le prince demandoit iustice tous les iours; que l'on vouloit vser sa patience par des delais: que l'on vouloit gagner la Majorité du Roy par des continuelles remises, & que ceux qui donnent de tels conseils, ont vne Politique que tous les subjets du Roy doiuent apprehender; qu'il n'y auoit guere d'aparence qu'ils eussent d'essein de leur faire iustice, quand ils auroient l'autorité en main dans vne Majorité, puis qu'ils la refusoient au premier Prince du Sang, iniustement calomnié dans les derniers iours de la Regence, qu'ils vouloient par cette conduite obliger M. le Prince à se retirer, de peur qu'il ne fut le tesmoin de leurs factions, & l'obstacle de toutes leurs intrigues; que les remonstrances du parlement sur ce sujet auoient esté tres-vigoureuses, que M. le premier President auoit dit qu'on ne pouuoit douter de la fidelité de M. le prince, puis qu'il l'auoit si souuent scellée avec son sang Royal, & que si le papier qui a esté enuoyé au parlement, n'eut porté le nom du Roy, on l'eut traité comme



vn escrit qui n'estoit point reuestu de toutes les formes necessaires. Vous entendez bien que cela veut dire biffé, & laceré.

Sur l'article où il est dit que les princes qui nous promettent aujourd'huy de belles choses les ont autrefois promises & ne les ont pas tenuës, & qu' auparauant le blocus ils auoient donné parole, qu'ils seroient nos protecteurs, & cependant qu'on les vit incontinant apres à la teste des troupes ennemies. On assura qu'il estoit faux que M. le prince se fut iamais engagé avec M. le Coadjuteur, & qu' apres le retour du Roy en cette ville, M. le prince demanda à M. le Coadjuteur en presence de M. le Prince de Conty, de M. de Champlatreux, & de trente autres personnes de qualité, s'il estoit vray qu'il luy eut iamais donné aucune parole d'engagement, & que M. le Coadjuteur demeura d'accord, qu'il n'en auoit iamais receu de M. le Prince, cela fut assuré par cinq ou six qui assistoient à la lecture de l'escrit.

Au reproche que l'on fait à M. le prince d'auoir voulu faire perir M. le Coadjuteur par des voyes contraires à nos mœurs, quelqu'un dit que ce mal-heureux procez auoit causé bien du desordre, mais qu'il estoit bien mal aisé de démêler toutes ces intrigues, qu'il estoit certain que le Cardinal, s'en estoit serui pour perdre M. le Prince, mais que ç'auoit esté de concert avec M. le Coad-



juteur, qui plus de quinze iours auparauant la iustification alloit tous les soirs au palais Royal déguisé, avec des habits de couleur & des plumes, que c'estoit luy qui auoit pris soin de par- rain Descoutures, qu'il l'auoit recommandé au Curé de S. Iean de Greve, qu'il le tint caché dans le clocher de son Eglise durant tout le procez, que c'estoit M. le Coadjuteur qui auoit sollicité l'amnistie de Descoutures, de Desmartinaux, Cantor, & Sociando : Enfin que depuis ce temps-là on auoit veu M. le Coadjuteur en parfaite intelligence avec les ennemis de M. le prince.

Dans l'endroit où il est dit que M. le prince a reuelé les conseils que M. le Coadjuteur luy auoit donnez avec sincerité de cœur & que par sa réponse il ne nie pas absolument de n'auoir rien iceu du changement de conseil qui fut fait à Pasques dernier. Chacun se récria que M. le Prince n'auoit rien dit que tout le monde ne sceut de fia, mais que M. le Coadjuteur auoit fort déguisé la verité dans le Parlement, puis qu'il n'auoit pas dit, que sur la proposition qu'il auoit faite, M. le prince auoit respondu, qu'il n'entendoit point la guerre des tuilles & des pots qu'on iette par les fenestres, ce qui eut fait iuger que M. le prince n'auoit rien aduancé qui ne fut vray, & quant au changement de Conseil, on ne treuua que trop de iustification dans la réponse de M. le prince.



Sur l'article où il est dit qu'on ne peut auoir du tout de confiance à M. le prince, que c'est bastir sur vn sable mouuant, & sur des esperances incertaines. Toute la compagnie iugea que M. le Coadiuteur fait cette plainte pour quelques interrests particuliers, pour lesquels on ne creut pas qu'il fust à propos d'approuuer toutes les intrigues qu'il fait avec Madame de Chevreuse pour se venger; l'on adiouta que nous ne deuons auoir que le bien public devant les yeux, & l'on demanda en suite si l'on deuoit se fier à vn homme qui fait seruir la chaise de verité à ses cabales, qui proteste mille fois le iour qu'il a renoncé aux affaires, qu'il ne se mesle que de siffler des linottes, & qui cependant court le iour & la nuit pour cabaler, & veut avec temerité disputer dans Paris le pavé au premier Prince du Sang, à qui il doit toute sorte de respect, & fait mille intrigues pour diuiser la maison Royale, dont la reünion est le seul moyen pour donner la paix à l'Estat.

On demeura d'accord que M. le prince deuoit prendre confiance à la parole Royale pourueu que ses ennemis n'eussent point assez de credit dans le Conseil pour faire prendre des resolutions contraires aux bonnes & iustes intentions de sa Majesté.

On dit qu'il estoit vray que M. le prince ne de-



mandoit point de place forte pour ostage, qu'il ne faisoit pas comme M. le Coadiuteur qui vou-  
lust auoir le mont Olympe pour son amy & pour  
la seureté de ceux de sa caballe lors qu'il se recon-  
cilia, mais quand on leut que si l'on manquoit de  
parole à M. le Prince il deuoit attendre du parle-  
ment & du peuple le mesme secours qu'il en a desia  
receu, on s'escria que la raillerie estoit forte, puis-  
que M. le Coadiuteur en auoit respondu depuis  
peu à la Cour.

Sur le reproche quel'on fait à M. le prince de ce  
qu'il ne va point au palais Royal, que les loix fon-  
damentales l'y obligent, & que le parlement l'a  
ordonné, chacun dit qu'il estoit iuste que M. le  
prince rendist ses respects au Roy, que son Altesse  
ne desiroit rien avec tant de chaleur, que si toutes  
les loix fondamentales de l'Estat estoient bien ob-  
seruées, les princes du Sang seroient autrement  
considerez dans le Conseil du Roy, puis qu'ils  
sont les legitimes administrateurs de l'Estat du-  
rant les minoritez de nos Roys, que le Cardinal  
Mazarin comme estranger n'auroit iamais esté  
admis dans le Ministère, que Messieurs de Gondy  
comme estrangers n'auroient iamais eu d'entrée  
dans le Conseil de nos Roys, qu'ils n'auroient ia-  
mais esté pourueus des premiers benefices du  
Royaume, que M. le Coadiuteur ne seroit point  
aujourd'huy en estat de vouloir temerairement  
aller



aller du pris avec nos Princes : & seroit trop heureux de faire paroistre son habilité dans la Banque de Florence, qu'au reste lors que le Parlemēt auoit desiré de M. le Prince qu'il allât à la Cour, il auoit satisfait au desir de la Compagnie, & que si depuis ce temps-là il n'y estoit point retourné M. le Duc d'Orleans en auoit fait sçauoir la raison, que cette alternatiue d'y aller necessairement ou de se retirer touchoit fort au cœur des ennemis de M. le Prince, qui ne souhaittoient pas tant les aduantages de son Altesse, qu'ils luy donnassent ce conseil sans auoir tramé quelque dessein contre sa personne, ou que sans doute ils auoient beaucoup d'impatience de le voir sortir afin de rendre sa conduite suspecte, que l'on voyoit bien que ceux qui veulent gouverner ne regardent que leurs seuls interets, puis qu'ils publient qu'il vaut mieux faire la guerre ciuille que de souffrir M. le Prince en repos dans Paris, & de luy permettre de se iustifier des calomnies qu'on luy impose : Enfin chacun conclut que les ambitieux vouloient entrer dans le Ministère, par la porte mesme de la sedition si il est necessaire.

On demeura d'accord qu'il falloit que M. le Prince contribuast a faire punir ceux qui ont volé le public, & personne ne doura que ce ne fust son intention.

Sur l'article où il est dit que M. le Prince proteste



de ne point aller à la Cour, tant que l'on mettra  
dans le Conseil des gens contre son consente-  
ment, bien loin d'appeller cette Declaration vne  
irreconciliation jurée avec la Cour, on demeura  
d'accord que M. le Prince a iusté sujet de craindre  
que l'autorité du gouvernement ne soit entre  
les mains de ses ennemis irreconciliables & cha-  
cun dit que c'estoit vne chose déplorable de souf-  
frir que l'intérêt de deux ou trois particuliers  
mette l'Etat en confusion, & que les peuples  
estoyent bien innocens de complaire à leurs pas-  
sions, & ie vous demande en effet M. le Curé, si  
leur présence est plus nécessaire à Paris que celle  
de nos Princes.

Quant au enieries de Dame Anne & de pèrche,  
tout le monde dit que c'estoyent des enfans de  
cœur éleuez par M. le Coadjuteur, qu'il y avoit  
ans que l'un & l'autre chantoit les Leçons du  
Breuière qu'il leur auoit enseigné, & qu'il ne de-  
uoit accuser de leur doctrine personne que luy-  
mesme; mais en mesme temps tout la Compagnie  
qui scauoit l'histoire du rudy, se mocqua du ha-  
zard qu'on pretend que M. le Coadjuteur y cour-  
rut, puisqne ce ne fut qu'une terreur panique, &  
que depuis mesme il a fait faire des complimens  
aux amis de M. le Prince, qui sont incapables de  
ses actions.

Voila ce qui fut dit à plus près lors que ie faisois



la lecture de l'*Avis Desintereffé*, vous iugerez par là que nos Bourgeois sont assez bien instruits, & qu'ils sont bien las de toutes les intrigues que ces esprits broüillons, qui n'ont fait autre chose, que de cabaler toute leur vie, continuent de faire pour troubler l'Estat & la famille Royale; Toute la Compagnie se levant dit qu'il estoit facile de juger que la confusion dans laquelle nous nous voyons n'a point d'autre cause que le mescontentemēt de Madame de Chevreuse, & de M. le Coadjuteur, & qu'on laissoit à iuger à ce qu'il y a de gens d'honneur, & de bons François dans le Royaume, s'il estoit iuste de persecuter vne branche de la Maison Royale, d'exposer la fortune de tous les particuliers, aux desordres d'une guerre civile: Afin d'allumer le feu pà tout le Royaume, parce que M. le Prince de Conty n'a point espousé Mauemoiselle de Chevreuse, & que M. le Coadjuteur n'a point eu le chapeau de Cardinal, quoy que M. le Coadjuteur soit la seule cause, qui par des empressements trop interessez, a empesché que le mariage n'ait esté executé, & que M. le Prince n'ait iamais formé d'obstacles à la promotion, ou M. le Coadjuteur aspire depuis le commencement de toutes les factions qu'il fomenté dans le Royaume.

F I N.



[illegible]